

განმარტებითი ბარათი

საქართველოს კანონის პროექტზე „გარემოსდაცვითი პასუხისმგებლობის შესახებ“

ა) ზოგადი ინფორმაცია კანონპროექტის შესახებ:

ა.ა) კანონპროექტის მიღების მიზეზი:

ა.ა.ა) პრობლემა, რომლის გადაჭრასაც მიზნად ისახავს კანონპროექტი:

კანონპროექტის მიღება განპირობებულია ერთის მხრივ, საქართველოსა და მეორეს მხრივ, ევროკავშირს და ევროპის ატომური ენერჯის გაერთიანებას და მათ წევრ სახელმწიფოებს შორის ასოცირების შესახებ შეთანხმების 306-ე მუხლიდან გამომდინარე, რომლის თანახმადაც საქართველო ვალდებულია მოახდინოს ეროვნული კანონმდებლობის დაახლოება წინამდებარე შეთანხმების XXVI დანართში მითითებულ ევროკავშირის საკანონმდებლო აქტებთან და საერთაშორისო სამართლებრივ ინსტრუმენტებთან. კერძოდ კი, ქვეყანა ვალდებულია გარემოსდაცვითი პასუხისმგებლობის შესახებ 2004 წლის 21 აპრილის ევროპარლამენტისა და საბჭოს 2004/35/EC დირექტივასთან ჰარმონიზაციის მიზნით განსაზღვროს კომპეტენტური ორგანო, რომელიც პასუხისმგებელი იქნება გარემოსდაცვითი პასუხისმგებლობის დაკისრების საკითხებზე, ამავდროულად, შექმნას სამართლებრივი მექანიზმები გარემოსათვის მიყენებული ზიანის პრევენციის/შერბილების/აღმოფხვრის მიზნით, შემოიღოს მკაცრი გარემოსდაცვითი პასუხისმგებლობის სამართლებრივი რეგულირება, იმ საქმიანობებისათვის, რომელიც მოცემულია ზემოაღნიშნული დირექტივის №3 დანართში, დააწესოს საქმიანობის განმახორციელებელი სუბიექტისათვის კონკრეტული ვალდებულებები ზიანის პრევენციის/შერბილების/აღმოფხვრისათვის და უზრუნველყოს საზოგადოების ჩართულობა ამ პროცესებში. სწორედ აღნიშნული დირექტივის მოთხოვნების გათვალისწინებით, შემუშავდა „გარემოსდაცვითი პასუხისმგებლობის შესახებ“ საქართველოს კანონის პროექტი.

ა.ა.ბ) არსებული პრობლემის გადასაჭრელად კანონის მიღების აუცილებლობა:

კანონპროექტი ხელს შეუწყობს ერთის მხრივ, საქართველოსა და მეორეს მხრივ, ევროკავშირს და ევროპის ატომური ენერჯის გაერთიანებას და მათ წევრ სახელმწიფოებს შორის ნაკისრი ვალდებულებების შესრულებას და მეორეს მხრივ, სწორი გარემოსდაცვითი პასუხისმგებლობის სისტემის ჩამოყალიბებას, რაც ქვეყანაში ევროპულ სტანდარტებთან შესაბამისი გარემოსდაცვითი მმართველობის შექმნის ერთ-ერთ უმთავრეს წინაპირობას წარმოადგენს. კანონპროექტით, იქმნება მყარი სამართლებრივი საფუძველი არა მხოლოდ მსხვილმასშტაბიანი სამუშაოების განმახორციელებელი კომპანიებისთვის, არამედ ყველა საწარმოსათვის, რომ გარემოსთვის მნიშვნელოვანი ზიანის მიყენების შემთხვევაში, მათ განახორციელონ შესაბამისი სარემედიაციო ღონისძიებები და საქმიანობის განხორციელებამდე შექმნან მყარი ფინანსური გარანტიები, რომ თუკი ზიანი დადგება, მათ ჰქონდეთ სათანადო თანხები მობილიზებული ამ ზიანის მოკლე ვადაში აღმოსაფხვრელად. ამავდროულად, კანონპროექტის ერთ-ერთი უმთავრესი მიზანია, პირველ რიგში, გარემოზე ზიანის მიყენების პრევენციისა და შერბილების სამართლებრივი რეგულირება, რასაც დღეს მოქმედი კანონმდებლობა არ არეგულირებს. კერძოდ, კანონპროექტით განისაზღვრება კონკრეტული ვალდებულებები საქმიანობის განმახორციელებელი პირისათვის, რომ მან უზრუნველყოს ზიანის პრევენცია/შერბილება, ამისათვის გაატაროს კონკრეტული ღონისძიებები, შეატყობინოს საქართველოს გარემოს დაცვისა და სოფლის მეურნეობის სამინისტროს სისტემაში შემავალ სახელმწიფო საქვეუწყებო დაწესებულება გარემოსდაცვითი

ზედამხედველობის დეპარტამენტს (შემდგომში - დეპარტამენტი) და გაატაროს ქმედითი ღონისძიებები იმისათვის, რომ ზიანი არ დადგეს და თავიდან იქნეს აცილებული. თუმცა, თუკი საქმიანობის შედეგად, გარემოზე ზიანის მიმყენებელი პირის უკანონო ქმედებით, გარემოს მაინც მიაღებდა მნიშვნელოვანი ზიანი, პირი ვალდებული იქნება შეასრულოს დამდგარი ზიანის სარემედიაციო ღონისძიებები, რომელიც გაწერილი იქნება ზიანის გამასწორებელი ღონისძიებების გეგმაში, რომელიც იქნება სახელმძღვანელო დოკუმენტი ზიანის მიყენებაზე პასუხისმგებელი პირისათვის. მსგავსი მიდგომა არსებობს ყველა ევროპულ ქვეყანაში.

ამავდროულად, ამავე კანონპროექტით გათვალისწინებულია გარემოსდაცვითი ზიანის პროგრამის შექმნა, რომლის მიზანი იქნება ზიანის პრევენცია, გარემოს მდგომარეობის აღდგენა, ასევე ისტორიულად დაზიანებული გარემოს მდგომარეობის გაუმჯობესება, გარემოს კვლევა. მსგავსი ტიპის გარემოსდაცვითი პროგრამები (ზოგან - ფონდები) არსებობს პოლონეთში, კანადაში, სლოვენიაში და სხვა ევროპულ ქვეყნებში და მათ მიზანსაც სწორედ დაზიანებული გარემოს აღსადგენად განსახორციელებელი ღონისძიებების დაფინანსება წარმოადგენს.

ამავე კანონპროექტით განისაზღვრება ადმინისტრაციული პასუხისმგებლობის საკითხები და ჯარიმათა ოდენობები. ევროკავშირის წევრ ქვეყნებში, უკანონო ქმედება, რომლისთვისაც გარემოს მიაღება ზიანი ადმინისტრაციული წესით, საკმაოდ მაღალი სანქციებით არის დასჯადი, რათა საქმიანობის განმახორციელებელ სუბიექტებს გააჩნდეთ მაღალი პასუხისმგებლობა და საქმიანობა წარმართონ გარემოსდაცვითი სტანდარტებისა და მოთხოვნების დაცვით.

ა.ბ) კანონპროექტის მოსალოდნელი შედეგები:

კანონპროექტის მიღებით ჩამოყალიბდება ევროპულ სტანდარტებთან დაახლოებული გარემოსდაცვითი პასუხისმგებლობის სისტემა, რომელიც დაეფუძნება „დამაბინძურებელი იხდის პრინციპს“ და რომლის მიზანიც იქნება გარემოსთვის მიყენებული ზიანის პრევენცია და აღმოფხვრა/შერბილება და აღდგენა.

მოქმედი კანონმდებლობა, კერძოდ კი „ტექნიკური რეგლამენტის - „გარემოსთვის მიყენებული ზიანის განსაზღვრის (გამოანგარიშების) მეთოდიკა“ დამტკიცების შესახებ“ საქართველოს მთავრობის 2014 წლის 14 იანვრის N54 დადგენილება აგებულია გარემოსთვის მიყენებული ზიანისათვის მონეტარულ პასუხისმგებლობაზე. ასევე, როგორც ცნობილია, გარემოსთვის მიყენებული ზიანის სანაცვლოდ გადახდილი თანხა მიიმართება სახელმწიფო ბიუჯეტში და მას არ აქვს განსაზღვრული მიზნობრიობა, რომ კონკრეტულად მოხმარდეს ისეთი ღონისძიებების განხორციელებას, რომლებიც უზრუნველყოფს დაზიანებული გარემოს აღდგენას. მოქმედი რეგულაციისგან განსხვავებით, წარმოდგენილ კანონპროექტს შემოაქვს სრულიად ახალი გარემოსდაცვითი პასუხისმგებლობის მექანიზმი, რომლის შესაბამისადაც, პირი, რომელიც გარემოს მნიშვნელოვან ზიანს მიაყენებს, ვალდებული იქნება გადაიხადოს არა თანხა, არამედ გაატაროს გარემოს აღსადგენად საჭირო გამასწორებელი ღონისძიებები წინასწარ განსაზღვრული გეგმა-გრაფიკის შესაბამისად. აქედან გამომდინარე, ზიანის თანხა მთლიანად მოხმარდება ამ ზიანის გამასწორებელი ღონისძიებების განხორციელებას. გარემოსდაცვითი პასუხისმგებლობის არსიც სწორედ იმაში გამოიხატება, რომ ის პირი, რომელმაც მიაყენა ზიანი გარემოს, თავად არის ვალდებული გამოასწოროს ეს ზიანი და ასევე ამ ზიანის გასწიოს შესაბამისი ხარჯები.

გამასწორებელი ღონისძიებების განხორციელების ვალდებულება გავრცელდება გარემოზე მნიშვნელოვანი ზიანის მიყენებაზე პასუხისმგებელ პირზე. თუმცა, კანონის პროექტი განსხვავებულ წესს ადგენს ფიზიკურ პირის („გარდა მეწარმეთა შესახებ“

საქართველოს კანონით გათვალისწინებული ინდივიდუალური მეწარმისა) მიერ განხორციელებული ქმედებით გამოწვეულ გარემოზე მიყენებული ზიანის შემთხვევაში. კანონპროექტი ასევე განსხვავებულ წესს ადგენს წიაღზე ზიანის მიყენების შემთხვევებისთვის და შავ ზღვაზე მცურავი საშუალებიდან, ან საქართველოს ტერიტორიაზე სატრანზიტო ტვირთის გადაზიდვისას გარემოზე მიყენებულ ზიანზე. აღნიშნულ შემთხვევაში გარემოზე მიყენებული ზიანის ოდენობის განსაზღვრა მოხდება „გარემოზე მიყენებული ზიანის ფულადი ანაზღაურების შესახებ“ ტექნიკური რეგლამენტის შესაბამისად. აღნიშნული გამომდინარეობს იქიდან, რომ გარემოსდაცვითი პასუხისმგებლობა ეფუძნება, როგორც ეს ასევე დირექტივითაც არის განსაზღვრული, საქმიანობიდან გამომდინარე ზიანს და შესაბამისად, უკავშირდება ზიანის კონკრეტულ მასშტაბებს. ნებისმიერი ერთჯერადი ქმედების შედეგად ფიზიკური პირისათვის გარემოსდაცვითი პასუხისმგებლობის დაკისრება და შესაბამისად, კონკრეტული გამასწორებელი ღონისძიებების დაკისრება, პრაქტიკაში არააღსრულებადი იქნებოდა.

რაც შეეხება წიაღზე მიყენებული ზიანს - მისი აღდგენა, პრაქტიკულად შეუძლებელია. შესაბამისად, მიზანშეწონილად ჩაითვალა აღნიშნულ შემთხვევაში ზიანის ფულადი ანაზღაურების დატოვება. ზიანის ანაზღაურების შედეგად გადახდილი თანხები მიიმართება გარემოსდაცვითი ზიანის პროგრამაში, ხოლო პროგრამაში აკუმულირებული თანხები კი მიზნობრივად მოხმარდება გარემოს მდგომარეობის გაუმჯობესებას.

საქართველოს ტერიტორიაზე სატრანზიტო ტვირთის გადაზიდვისას გარემოზე მიყენებული ზიანის შემთხვევაში ზიანის ფულადი ანაზღაურების ვალდებულების დატოვების მიზეზს ასევე წარმოადგენს ის გარემოება, რომ ასეთი ზიანის შემთხვევაში პრაქტიკაში არააღსრულებადი იქნება ტვირთის გადამზიდავი პირებისათვის იმ ღონისძიებების განხორციელების ვალდებულების დაკისრება რაც გათვალისწინებულია წარმოდგენილი კანონპროექტით, რადგან გამასწორებელი ღონისძიებების გეგმა შესაძლებელია ითვალისწინებდეს დროში გაწერილი რიგი განსახორციელებელი ღონისძიებების ერთობლიობას, რასაც შესაძლებელია უმეტეს შემთხვევაში დასჭირდეს არაერთი კვირა თუ თვე, შესაძლებელია წელიც. გამომდინარე აღნიშნულიდან ამ შემთხვევაშიც მიზანშეწონილად ჩაითვალა გარემოზე მიყენებული ზიანის ფულადი ანაზღაურების ვალდებულების დატოვება, აღნიშნული თანხები ამ შემთხვევაშიც მიმართული იქნება გარემოსდაცვითი ზიანის პროგრამაში და მიზნობრივად მოხმარდება დაზიანებული გარემოს აღდგენას.

კანონპროექტი, ისევე როგორც დირექტივა, ერთმანეთისგან ანსხვავებს „გარემოსდაცვით პასუხისმგებლობას“ და „მკაცრ გარემოსდაცვით პასუხისმგებლობას“. მკაცრი გარემოსდაცვითი პასუხისმგებლობა ეკისრება პირს, რომელიც ახორციელებს გარემოსთვის განსაკუთრებით საშიშ საქმიანობას და მისი საქმიანობიდან გამომდინარე გარემოს მიადგა მნიშვნელოვანი ზიანი. ასეთ დროს პირს დაეკისრება გამასწორებელი ღონისძიებების განხორციელების ვალდებულება მაშინაც, თუ ზიანი დადგა მისი ბრალეულობის გარეშე. აღნიშნული გამომდინარეობს დირექტივის მოთხოვნიდან. ამავე დროს საქართველოს სამოქალაქო კოდექსი იცნობს პასუხისმგებლობას ბრალის გარეშე (კარი III დელიქტური ვალდებულებანი. მაგალითისათვის, მუხლი 1000. „პასუხისმგებლობა ნაგებობიდან გამომდინარე მომეტებული საფრთხით გამოწვეული ზიანისათვის“; მუხლი 999. „სატრანსპორტო საშუალების ექსპლუატაციის შედეგად დამდგარი ზიანის ანაზღაურება“). შესაბამისად, იმ შემთხვევაში, თუ გარემოზე მიყენებული მნიშვნელოვანი ზიანი გამოწვეული იქნება გარემოსთვის განსაკუთრებით საშიში (ზიანის მიყენების წყაროა

მომეტებული საფრთხის შემცველი საწარმო ან საქმიანობა) საქმიანობიდან გამომდინარე, ან აღნიშნული საქმიანობიდან გამომდინარე ვალდებულების შეუსრულებლობით, ასეთ შემთხვევაში ზიანის ანაზღაურების ვალდებულება დაეკისრება ასეთი მომეტებული საფრთხის შემცველი საქმიანობის განმახორციელებელს. კანონპროექტით მნიშვნელოვანი ზიანი განმარტებულია, როგორც გარემოზე, კერძოდ, ბიომრავალფეროვნებაზე ან/და მიწაზე ან/და წყლის ობიექტზე მიყენებული ისეთი ზიანი, რომელიც გამოწვეულია პირის ან სხვა ორგანიზაციული წარმონაქმნის მიერ, რა დროსაც აუცილებელია გარემოს დაზიანების დონე შეესაბამებოდეს კანონპროექტის დანართი 1-ით განსაზღვრულ კრიტერიუმებს.

ა.გ) კანონპროექტის ძირითადი არსი:

კანონპროექტის პირველი მუხლი განსაზღვრავს კანონის პროექტის მიზანს და იმ პრინციპს, რომელზეც აგებულია გარემოსდაცვითი პასუხისმგებლობის ახალი სისტემა. კერძოდ, კანონის მიზანია გარემოზე ზიანის მიყენების საკითხების სამართლებრივი რეგულირება, „დამზინძურებელი იხდის“ პრინციპის შესაბამისად. „დამზინძურებელი იხდის“ პრინციპი წარმოადგენს გარემოს დაცვის ერთ-ერთ ძირითად პრინციპს „გარემოს დაცვის შესახებ“ საქართველოს კანონის მე-5 მუხლის მე-2 პუნქტის „ე“ ქვეპუნქტის შესაბამისად და გულისხმობს ფიზიკური ან იურიდიული პირის ან სხვა ორგანიზაციული წარმონაქმნის ვალდებულებას, გარემოსთვის ზიანის მიყენების შემთხვევაში განახორციელოს შესაბამისი შემარბილებელი და გამასწორებელი ღონისძიებები და გაილოს შესაბამისი ხარჯები ან/და აანაზღაუროს გარემოსთვის მიყენებული ზიანი. აღნიშნული პრინციპის საფუძველზე არის აგებულია მთლიანად გარემოსდაცვითი პასუხისმგებლობის შესახებ დირექტივა და გამომდინარეობს ევროკავშირის ფუნქციონირების შესახებ ხელშეკრულების 191-ე მუხლის მე-2 პუნქტიდან.

კანონპროექტის მე-2 მუხლის განსაზღვრავს კანონის რეგულირების სფეროს და განსაზღვრავს გარემოზე ზიანის მიყენების იმ შემთხვევებს, რომლებზეც არ გავრცელდება კანონის მოქმედება.

კანონპროექტის მე-3 მუხლში მოცემულია ტერმინთა განმარტებანი.

კანონპროექტის მე-4 მუხლი არეგულირებს ზიანის პრევენციასთან დაკავშირებულ საკითხებს. დღეს მოქმედი კანონმდებლობა არ ითვალისწინებს ზიანის პრევენციის საკითხებს. შესაბამისად კანონის პროექტს შემოაქვს კიდევ ერთი ახალი მექანიზმი, რომელიც უზრუნველყოფს გარდაუვალი ზიანის საფრთხის წარმოშობის შემთხვევაში, ასეთი ზიანის დადგომის თავიდან აცილებას ან შერბილებას. აღნიშნული მექანიზმის ამოქმედების შედეგად შემცირდება გარემოსთვის ზიანის მიყენების შემთხვევები. ზიანის პრევენციის მექანიზმი ხელს შეუწყობს საქმიანობის განმახორციელებლებს წინასწარ შეაფასონ გარემოსდაცვითი რისკები და მართონ იმგვარად, რომ თავიდან აიცილონ ზიანის დადგომა. ზიანის პრევენციის მექანიზმი ასევე შეამცირებს საქმიანობის განმახორციელებლის მიერ გასაწევ ხარჯებს, რადგან პრევენციისათვის საჭირო ღონისძიებების განხორციელების შედეგად, დიდი ალბათობით ზიანი აღარ უნდა დადგეს და საქმიანობის განმახორციელებელს აღარ მოუწევს დამდგარი ზიანის აღდგენის ღონისძიებების გატარება. ცხადია, პრევენციის მექანიზმი არ გამორიცხავს ზიანის დადგომის შემთხვევებსაც, თუმცა ცალსახად უნდა შეამციროს მათი ოდენობა.

ზიანის პრევენციის მექანიზმი ავალდებულებს საქმიანობის განმახორციელებელს, გარემოზე ზიანის მიყენების გარდაუვალი საფრთხის წარმოშობისთანავე, დაუყოვნებლივ შეატყობინოს აღნიშნულის შესახებ დეპარტამენტს და გაატაროს ყველა აუცილებელი ღონისძიება ზიანის შერბილებისთვის/პრევენციისთვის. დეპარტამენტი, თავის მხრივ, უფლებამოსილი იქნება საქმიანობის განმახორციელებს მოსთხოვოს ინფორმაცია საფრთხესთან დაკავშირებით, იმ შემთხვევაში, თუ საქმიანობის განმახორციელებელი თავად

არ განსაზღვრავს პრევენციულ ღონისძიებებს ან განსაზღვრული ღონისძიებები არ იქნება სათანადოდ, დეპარტამენტი თავად განუსაზღვრავს მას შესასრულებლად სავალდებულო ღონისძიებებს, ხოლო იმ შემთხვევაში, თუ საქმიანობის განმახორციელებელი არ შეასრულებს პრევენციულ ღონისძიებებს, დეპარტამენტს ასევე უფლება ექნება მოსთხოვოს მას შესაბამისი პრევენციული ღონისძიებების გატარება. ზემოაღნიშნული ღონისძიებების შეუსრულებლობა გამოიწვევს ადმინისტრაციულ პასუხისმგებლობას. თუ საქმიანობის განმახორციელებელი ზიანის პრევენციასთან დაკავშირებულ ვალდებულებებს, დეპარტამენტი უფლებამოსილია მიმართოს გარემოსდაცვითი ზიანის პროგრამის კომისიას, აუცილებელი ღონისძიებების განხორციელებასთან დაკავშირებით. საქმიანობის სუბიექტი ვალდებულია აანაზღაუროს გარემოსდაცვითი ზიანის პროგრამიდან აუცილებელი ღონისძიებების განხორციელების მიზნით გაღებული ხარჯები. აღნიშნული თანხა მიიმართება სახელმწიფო ბიუჯეტში, სახელმწიფო ხაზინის ერთიან ანგარიშზე.

კანონპროექტი მე-5 მუხლი ეხება უკვე დამდგარ მნიშვნელოვან ზიანს. ამ დროს საქმიანობის განმახორციელებელი ვალდებული იქნება ამის შესახებ დაუყოვნებლივ შეატყობინოს დეპარტამენტს, გაატაროს საჭირო ღონისძიებები ზიანის შემდგომი გავრცელების თავიდან ასაცილებლად ან/და შესარბილებლად და დადგენილი წესით განახორციელოს გამასწორებელი ღონისძიებები. გამასწორებელი ღონისძიებების დადგენილი წესით შეთანხმებიდან 30 კალენდარული დღის ვადაში სახელმწიფო ბიუჯეტში, სახელმწიფო ხაზინის ერთიან ანგარიშზე, მიმართოს მნიშვნელოვანი ზიანის გამასწორებელი ღონისძიებების ხარჯთაღრიცხვით განსაზღვრული ღონისძიებების საერთო ღირებულების 2%, ან იგივე თანხა, განწილვადებით, პროპორციულად - გამასწორებელი ღონისძიებების გეგმის განხორციელების საერთო ვადაში, ზემოაღნიშნულ ანგარიშზე მიმართოს ყოველთვიურად.

ამავდროულად, ზიანის დადგომის შემთხვევაში დეპარტამენტი უფლებამოსილი იქნება გამოითხოვოს ინფორმაცია საქმიანობის განმახორციელებლისგან, მოსთხოვოს მას ზიანის შემდგომი გავრცელების თავიდან ასაცილებლად ან/და შესარბილებლად საჭირო აუცილებელი (გადაუდებელი) ღონისძიებებისა და გამასწორებელი ღონისძიებების განხორციელება.

კანონპროექტის მე-6 მუხლი განსაზღვრავს გარემოზე მიყენებული ზიანის შეფასებისა და გადაწყვეტილების მიღების წესებს. ზიანის დადგომის შემთხვევაში დეპარტამენტი აფასებს სახეზეა ზიანი თუ მნიშვნელოვანი ზიანი და იღებს შესაბამის გადაწყვეტილებას. მნიშვნელოვანი ზიანის განსაზღვრის კრიტერიუმებს ადგენს წარმოდგენილი კანონის პროექტის დანართი 1 - სადაც დეტალურად არის გაწერილი რა ჩაითვლება ბიომრავალფეროვნებაზე, მიწაზე, და წყალზე მნიშვნელოვანი ზიანის მიყენებად.

იმ შემთხვევაში, თუ პირი ექცევა მკაცრი გარემოსდაცვითი პასუხისმგებლობის ქვეშ, მას გარემოსდაცვითი პასუხისმგებლობა კანონპროექტის შესაბამისად ეკისრება მიუხედავად მისი ბრალეულობისა. შესაბამისად, მას გარემოსდაცვითი პასუხისმგებლობა დაეკისრება ზიანის შეფასების თაობაზე გადაწყვეტილების მიღებისთანავე, ხოლო სხვა შემთხვევებში გარემოსდაცვითი პასუხისმგებლობა პირს დაეკისრება მნიშვნელოვანი ზიანის გამომწვევი ქმედებისათვის პასუხისმგებლობის დაკისრების თაობაზე შესაბამისი გადაწყვეტილების კანონიერ ძალაში შესვლის შემდგომ.

კანონპროექტის მე-7 და მე-8 მუხლები ადგენენ გამასწორებელი ღონისძიებების სახეებსა და მათი განსაზღვრის წესს. გამასწორებელი ღონისძიებებია: გარემოს პირვანდელ (ზიანის მიყენებამდე) მდგომარეობაში აღგენა, გარემოს პირვანდელ (ზიანის მიყენებამდე) მდგომარეობასთან მიახლოებულ მდგომარეობამდე აღდგენა, დაზიანებული ტერიტორიის

მიმდებარე ან სხვა ტერიტორიაზე სანაცვლო/ადექვატური გამასწორებელი ღონისძიებების განხორციელება. პრიორიტეტი უნდა მიენიჭოს გარემოს პირვანდელ მდგომარეობაში აღდგენას, ხოლო თუ ეს შეუძლებელია უნდა განხორციელდეს გარემოს პირვანდელ მდგომარეობასთან მიახლოებულ მდგომარეობამდე აღდგენა, ხოლო თუ ესეც შეუძლებელია, ამ შემთხვევაში უნდა განხორციელდეს დაზიანებული ტერიტორიის მიმდებარე ან სხვა ტერიტორიაზე სანაცვლო/ადექვატური გამასწორებელი ღონისძიებები. ამ პრინციპებზე და რიგითობაზე არის დამყარებული დირექტივის მოთხოვნები, შესაბამისად, კანონპროექტიც განსაზღვრავს იმავე აუცილებელ რიგითობას, როგორც ეს დირექტივაშია მოცემული.

მნიშვნელოვანი ზიანის მიყენებაზე პასუხისმგებელი პირი ვალდებული იქნება, ზიანის კატეგორიის განსაზღვრის შესახებ დეპარტამენტის მიერ გადაწყვეტილების მიღებიდან 180 კალენდარული დღის ვადაში, სსიპ გარემოს ეროვნულ სააგენტოს წარუდგინოს ზიანის გამასწორებელი ღონისძიებების გეგმის პროექტი (ღონისძიებების ჩამონათვალით და მათი განხორციელების ვადებით). აღნიშნულ პროექტს თან უნდა ერთვოდეს აუდიტორის/აუდიტორული ფირმის მიერ დადასტურებული ზიანის გამასწორებელი ღონისძიებების გეგმის პროექტის ხარჯთაღრიცხვა.

იმ შემთხვევაში, თუ შეუძლებელია გარემოს პირვანდელ მდგომარეობაში ან მასთან მიახლოებულ მდგომარეობაში აღდგენა, მნიშვნელოვანი ზიანის მიყენებაზე პასუხისმგებელი პირი ვალდებულია განახორციელოს სანაცვლო/ადექვატური გამასწორებელი ღონისძიებები. ამ შემთხვევაში მნიშვნელოვანი ზიანის მიყენებაზე პასუხისმგებელ პირი ვალდებულია 60 კალენდარული დღის ვადაში სსიპ გარემოს ეროვნულ სააგენტოს წარუდგინოს დასაბუთება, რომელიც დაადასტურებს, რომ დაზიანებული გარემოს პირვანდელ ან მასთან მიახლოებულ მდგომარეობაში აღდგენა შეუძლებელია, რაც წარმოშობს დაზიანებული ტერიტორიის მიმდებარე ან სხვა ტერიტორიაზე ზიანის გამასწორებელი სანაცვლო/ადექვატური ღონისძიებების გამოყენების საჭიროებას.

გამასწორებელი ღონისძიებების გეგმის წარმოდგენის ვალდებულების შეუსრულებლობისთვის მნიშვნელოვანი ზიანის მიყენებაზე პასუხისმგებელ პირს ეკისრება ადმინისტრაციული პასუხისმგებლობა კანონმდებლობით დადგენილი წესით, ამავე დროს თუ ადმინისტრაციული პასუხისმგებლობის დაკისრების მიუხედავად მნიშვნელოვანი ზიანის მიყენებაზე პასუხისმგებელი პირი არ ასრულებს ვალდებულებას, დეპარტამენტი უფლებამოსილია მიმართოს გარემოსდაცვითი ზიანის პროგრამის კომისიას, გამასწორებელი ღონისძიებების გეგმის შემუშავებაზე პასუხისმგებელი ორგანოს განსაზღვრის თაობაზე რეკომენდაციის მისაღებად, ხოლო რეკომენდაცია, შესაბამისი გადაწყვეტილების მისაღებად, წარედგინება სამინისტროს. გამასწორებელი ღონისძიებების გეგმის შემუშავების ხარჯები დაეკისრება ზიანის მიყენებაზე პასუხისმგებელ პირს. გარემოსდაცვითი ზიანის პროგრამაში არსებული ასიგნების ფარგლებში, გარემოსდაცვითი ზიანის პროგრამის კომისია დადგენილი წესით შეიმუშავებს რეკომენდაციას მნიშვნელოვანი ზიანის გამასწორებელი ღონისძიებების გეგმის შემუშავებაზე პასუხისმგებელი ორგანოს განსაზღვრის, ასევე ამ ღონისძიებების შესაბამისი დაფინანსების განსაზღვრის თაობაზე. გარემოსდაცვითი ზიანის პროგრამის კომისიის რეკომენდაცია წარედგინება სამინისტროს, რომელიც იღებს საბოლოო გადაწყვეტილებას მნიშვნელოვანი ზიანის გამასწორებელი ღონისძიებების გეგმის შემუშავებაზე პასუხისმგებელი ორგანოს განსაზღვრისა და ამ ღონისძიებისთვის შესაბამისი დაფინანსების განსაზღვრის თაობაზე. მნიშვნელოვანი ზიანის გამასწორებელი ღონისძიებების გეგმის შემუშავებაზე პასუხისმგებელ ორგანოდ შესაძლებელია განისაზღვროს სამინისტროს სისტემაში შემავალი დაწესებულება, გარდა დეპარტამენტისა.

კანონპროექტის მე-9 მუხლი ადგენს დაზიანებული ტერიტორიის მიმდებარე ან სხვა ტერიტორიაზე ზიანის გამასწორებელი სანაცვლო/ადექვატური ღონისძიებების განსაზღვრის პროცედურებს. დაზიანებული ტერიტორიის მიმდებარე ან სხვა ტერიტორიაზე ზიანის გამასწორებელი სანაცვლო/ადექვატური ღონისძიებების განსაზღვრის მიზნით, მინისტრის ინდივიდუალური ადმინისტრაციულ-სამართლებრივი აქტით იქმნება დაზიანებული ტერიტორიის მიმდებარე ან სხვა ტერიტორიაზე ზიანის გამასწორებელი სანაცვლო/ადექვატური ღონისძიებების განსაზღვრელი კომისია. კომისიის მიერ განსაზღვრული დაზიანებული ტერიტორიის მიმდებარედ ან სხვა ტერიტორიაზე ზიანის გამასწორებელი სანაცვლო/ადექვატური ღონისძიებები წარედგინება ზიანის მიყენებაზე პასუხისმგებელ პირს, რომელიც ვალდებულია მისი ჩაბარებიდან 180 კალენდარული დღის ვადაში სსიპ გარემოს ეროვნულ სააგენტოს (შემდგომში - სააგენტო) შესათანხმებლად წარუდგინოს შესაბამისი აკრედიტაციის მქონე პირის მიერ მომზადებული ზიანის გამასწორებელი ღონისძიებების გეგმა (ღონისძიებების ჩამონათვალით და მათი განხორციელების ვადებით). ზიანის გამასწორებელი ღონისძიებების გეგმის პროექტს თან უნდა ერთვოდეს აუდიტორის/აუდიტორული ფირმის მიერ დადასტრებული ზიანის გამასწორებელი ღონისძიებების გეგმის პროექტის ხარჯთაღრიცხვა.

კანონპროექტის მე-10 მუხლის შესაბამისად, დაინტერესებულ პირს ეძლევა შესაძლებლობა, გარემოზე მიყენებული მნიშვნელოვანი ზიანის არსებობის შემთხვევაში, მონაწილეობა მიიღოს გამასწორებელი ღონისძიებების განსაზღვრაში. ამ მიზნით სააგენტო ზიანის გამასწორებელი ღონისძიებების გეგმის პროექტს, მისი სსიპ გარემოს ეროვნულ სააგენტოში წარდგენიდან 5 კალენდარული დღის ვადაში, განათავსებს სააგენტოს ოფიციალურ ვებგვერდზე. გეგმის პროექტის ვებგვერდზე განთავსებიდან 30 კალენდარული დღის ვადაში სააგენტო იხილავს დაინტერესებული პირების მიერ წერილობით წარმოდგენილ მოსაზრებებს/შენიშვნებს. საჭიროების შემთხვევაში სააგენტო დაინტერესებული პირების მიერ წარმოდგენილ შენიშვნებს/მოსაზრებებს უგზავნის მნიშვნელოვანი ზიანის მიყენებაზე პასუხისმგებელ პირს მათი ზიანის გამასწორებელი ღონისძიებების გეგმაში ასახვის მიზნით. მნიშვნელოვანი ზიანის მიყენებაზე პასუხისმგებელი პირი ვალდებულია დაინტერესებული პირების მიერ წარმოდგენილ შენიშვნებს/მოსაზრებების მიღებიდან (ჩაბარებიდან) 45 კალენდარული დღის ვადაში, სააგენტოში შესათანხმებლად წარადგინოს შენიშვნების გათვალისწინებით გადამუშავებული ზიანის გამასწორებელი ღონისძიებების საბოლოო გეგმა. გამასწორებელი ღონისძიებების გეგმის პროექტთან დაკავშირებით დაინტერესებული პირების მიერ გამოთქმული მოსაზრებების/შენიშვნების გათვალისწინებლობის შემთხვევაში მნიშვნელოვან ზიანის მიყენებაზე პასუხისმგებელი პირი ვალდებულია, გამასწორებელი ღონისძიებების საბოლოო გეგმის სააგენტოში წარდგენის ვადის ამოწურვამდე სააგენტოში წარმოადგინოს ზემოაღნიშნულ მოსაზრებების/შენიშვნების გათვალისწინებაზე უარის შესაბამისი დასაბუთება, რომელიც განთავსდება სააგენტოს ვებგვერდზე.

კანონპროექტის მე-11-ე მუხლის შესაბამისად, სააგენტო ზიანის გამასწორებელი ღონისძიებების გეგმას იხილავს და ითანხმებს სააგენტოში წარდგენიდან 120 კალენდარული დღის ვადაში. სააგენტოსთან შეთანხმებული გამასწორებელი ღონისძიებების გეგმის შესრულება მნიშვნელოვანი ზიანის მიყენებაზე პასუხისმგებელი პირისთვის სავალდებულოა. მნიშვნელოვანი ზიანის მიყენებაზე პასუხისმგებელი პირი უფლებამოსილია სააგენტოს მიმართოს შუამდგომლობით ზიანის გამასწორებელი ღონისძიებების გეგმით განსაზღვრული ღონისძიების შეცვლის თაობაზე. შუამდგომლობა უნდა შეიცავდეს დასაბუთებას, რომ შეთანხმებული ზიანის გამასწორებელი ღონისძიებების

გეგმით გათვალისწინებული ღონისძიების შესრულება ვერ უზრუნველყოფს ზიანის გამოსწორებას ან/და ამ ღონისძიების სხვა ღონისძიებით შეცვლა აუცილებელი და ეფექტიანია ზიანის გამოსწორების თვალსაზრისით ან წარმოიშვა ფორსმაჟორული სიტუაცია, რაც განაპირობებს ზიანის გამასწორებელი ღონისძიებების გეგმაში ცვლილების შეტანის საჭიროებას. ზიანის გამასწორებელი ღონისძიებების გეგმით განსაზღვრული ღონისძიების შეცვლასთან დაკავშირებით ამ კანონის მე-10 მუხლით გათვალისწინებული პროცედურების განხორციელება სავალდებულოა. ზიანის გამასწორებელი ღონისძიებების გეგმაში ცვლილების განხორციელებასთან დაკავშირებით გადაწყვეტილებას სააგენტო იღებს შესაბამისი მიმართვის წარდგენიდან 60 კალენდარული დღის ვადაში. ცვლილებასთან დაკავშირებული გადაწყვეტილების მიღებამდე ჩერდება იმ გამასწორებელი ღონისძიების შესრულების ვადის დინება, რომლის შეცვლაც არის მოთხოვნილი.

ამავე დროს მნიშვნელოვანი ზიანის მიყენებაზე პასუხისმგებელი პირი ვალდებულია უზრუნველყოს ზიანის გამასწორებელი ღონისძიების გეგმის განხილვისთვის, ასევე მასში ცვლილებების შეტანის საკითხის განხილვისა და დაზიანებული ტერიტორიის მიმდებარე ან სხვა ტერიტორიაზე მნიშვნელოვანი ზიანის გამასწორებელი სანაცვლო/ადექვატური ღონისძიებების გამოყენების საჭიროების განხილვისთვის, სააგენტოს მიერ გაწეული ხარჯების სრულად ანაზღაურება. ხარჯების გაანგარიშებისა და ანაზღაურების წესები განისაზღვრება საქართველოს კანონმდებლობით.

კანონპროექტის მე-12 მუხლი შესაბამისად გამასწორებელი ღონისძიებების გატარებაზე ზედამხედველობას ახორციელებს სსდ - გარემოსდაცვითი ზედამხედველობის დეპარტამენტი. ზიანის მიყენებაზე პასუხისმგებელ პირს გამასწორებელი ღონისძიებების გეგმის შეუსრულებლობისათვის ეკისრება პასუხისმგებლობა კანონმდებლობით დადგენილი წესით.

კანონპროექტის მე-13 მუხლს შემოაქვს გარემოსდაცვითი რისკის ფინანსური უზრუნველყოფის ვალდებულება. აღსანიშნავია, რომ დირექტივა იძლევა შესაძლებლობას ქვეყნებმა შექმნან სხვადასხვა სახის ფინანსური გარანტიები (დაზღვევა, საბანკო გარანტია და სხვ.), იმისთვის, რომ მოხდეს გარემოსდაცვითი რისკის დაზღვევა. გარემოსათვის მიყენებული ზიანის დაზღვევა ფართოდ არის გავრცელებული ევროკავშირის წევრ სახელმწიფოებში. კანონპროექტის დანართი 2-ით გათვალისწინებული გარემოსთვის განსაკუთრებით საშიში საქმიანობებისათვის კანონპროექტის მე-13 მუხლი განსაზღვრავს გარემოსდაცვითი რისკის ფინანსური უზრუნველყოფის ვალდებულებას.

თუმცა ამავდროულად, გამომდინარე იქიდან, რომ ამ მექანიზმის შემოღება მნიშვნელოვანწილად არის დამოკიდებული კერძო სექტორსა და ბაზარზე არსებულ მოთხოვნაზე, ამასთან, იმის გათვალისწინებით, რომ გარემოსდაცვითი რისკის ფინანსური უზრუნველყოფას სავალდებულო ხასიათი ექნება აუცილებელია, რომ ამ მექანიზმის ამოქმედებამდე დაწესდეს გარდამავალი პერიოდი, რა დროსაც მოხდება არსებული მდგომარეობისა და სამომავლო გამოწვევების წინასწარი შესწავლა და შეფასება, ასევე გაიმართება კონსულტაციები კერძო სექტორის წარმომადგენლებთან, რათა ჩამოყალიბდეს სწორი და გამართული სისტემა, რომელიც შემდგომ პრაქტიკაში გამოყენებადი და ეფექტიანი იქნება. შესაბამისად, აღნიშნული შესწავლისა და კონსულტაციების შედეგად, საქართველოს მთავრობას დაევალება 2023 წლის 1 იანვრამდე დაამტკიცოს ტექნიკური რეგლამენტი „გარემოსდაცვითი რისკის ფინანსური უზრუნველყოფის შესახებ“.

კანონპროექტის მე-14-მე-16 მუხლებით რეგულირდება გარემოსდაცვითი ზიანის პროგრამასთან დაკავშირებული საკითხები. ეკოლოგიური/გარემოსდაცვითი პროგრამები (ზოგან ფონდები) ფართოდ არის გავრცელებული როგორც ევროკავშირის წევრ

სახელმწიფოებში, ისე სხვა ქვეყნებში (პოლონეთი, სლოვენია, მოლდოვა, კანადა). ასეთი ინსტიტუციები სხვადასხვა სახით არსებობს (როგორც დამოუკიდებელი საჯარო სამართლის იურიდიული პირების, ასევე, ცალკე ანგარიშის სახით) და ძირითად მიზანს წარმოადგენს მოახდინოს შესაბამისი გარემოსდაცვითი მიზნების უზრუნველსაყოფად, სახსრების აკუმულირება და მათი გამოყოფა სხვადასხვა გარემოსდაცვითი ღონისძიებების განსახორციელებლად. ასეთი პროგრამებიდან ფინანსდება გარემოზე მიყენებული ზიანის გამასწორებელი ღონისძიებები (მათ შორის, ხდება ისტორიულად დაზიანებული ტერიტორიების აღდგენა). აკუმულირებული თანხები შესაძლებელია გამოყენებულ იქნას გარემოზე ზიანის პრევენციისთვის, გარემოს მდგომარეობის აღდგენისთვის, გარემოს მდგომარეობის გაუმჯობესებისთვის და ა.შ.

კანონპროექტის მე-17-26-ე მუხლები განსაზღვრავს ადმინისტრაციულ სამართალდარღვევებსა და ადმინისტრაციული წარმოების წესს. ადმინისტრაციული პასუხისმგებლობა დაეკისრება პირს ამ კანონით გათვალისწინებული ვალდებულებების შეუსრულებლობისათვის, როგორც არის ზიანის პრევენციის/შერბილებისათვის აუცილებელი ღონისძიებების გაუტარებლობა, გამასწორებელი ღონისძიებების შეუსრულებლობა და ა.შ. ჯარიმის თანხები განისაზღვრება იმგვარად, რომ სახდელს ჰქონდეს რეალური და შემაკავებელი ეფექტი.

კანონპროექტის 27-ე მუხლი განსაზღვრავს სისხლის სამართლის პასუხისმგებლობის საკითხებს და აკეთებს მითითებას სისხლის სამართლის კოდექსზე.

კანონპროექტის 28-ე მუხლის შესაბამისად - ამ კანონის ამოქმედებამდე პირის უკანონო ქმედებით გამოწვეული გარემოზე მიყენებული ზიანი დაანგარიშდეს და ანაზღაურდეს ამ კანონის ამოქმედებამდე არსებული წესით, ხოლო თუ ამ კანონის ამოქმედებამდე, უკანონო ქმედებით გარემოზე მიყენებული ზიანისათვის პირს ჯერ არ დაკისრებია გარემოზე მიყენებული ზიანის ანაზღაურება (არ არსებობს კანონიერ ძალაში შესული შესაბამისი გადაწყვეტილება), ამ პუნქტით გათვალისწინებული პირი უფლებამოსილია მიმართოს დეპარტამენტს და მოითხოვოს ამ კანონით გათვალისწინებული გარემოსდაცვითი პასუხისმგებლობის ან/და მკაცრი გარემოსდაცვითი პასუხისმგებლობის დაკისრების პროცედურების მასზე გავრცელება. იმ შემთხვევაში, თუ პირი გამოიყენებს მის ამ უფლებამოსილებას, იგი კარგავს უფლებას აანაზღაუროს გარემოზე მიყენებული ზიანი ამ კანონის ამოქმედებამდე არსებული წესით. აღნიშნულ შემთხვევაში ზიანის შეფასება და შესაბამისად გარემოსდაცვითი პასუხისმგებლობის ან/და მკაცრი გარემოსდაცვითი პასუხისმგებლობის დაკისრება განხორციელდეს მხოლოდ ამ კანონით დადგენილ შემთხვევებში და ამ კანონით დადგენილი წესით.

კანონპროექტის 29-ე მუხლი განსაზღვრავს კანონის ამოქმედებასთან დაკავშირებით მისაღები/გამოსაცემი კანონქვემდებარე ნორმატიული აქტების ჩამონათვალს და გასატარებელ ღონისძიებებს.

კანონპროექტის 30-ე მუხლი განსაზღვრავს კანონის ამოქმედების ვადებს.

კანონპროექტის დანართი 1-ით გათვალისწინებულია მნიშვნელოვანი ზიანის განსაზღვრის კრიტერიუმები ბიომრავალფეროვნებისთვის, მიწისა და წყლისთვის.

კანონპროექტის დანართი 2-ში მოცემულია გარემოსთვის განსაკუთრებით საშიში საქმიანობების ნუსხა.

ა.დ) კანონპროექტის კავშირი სამთავრობო პროგრამასთან და შესაბამის სფეროში არსებულ სამოქმედო გეგმასთან, ასეთის არსებობის შემთხვევაში (საქართველოს მთავრობის მიერ ინიცირებული კანონპროექტის შემთხვევაში):

„ერთი მხრივ, ევროკავშირს და ევროპის ატომური ენერჯის გაერთიანებას და მათ წევრ სახელმწიფოებსა და, მეორე მხრივ, საქართველოს შორის ასოცირების შესახებ შეთანხმებისა“ და საქართველოსა და ევროკავშირს შორის ასოცირების დღის წესრიგის განხორციელების 2016 წლის ეროვნული სამოქმედო გეგმის დამტკიცების შესახებ” საქართველოს მთავრობის 2016 წლის 7 მარტის N382 განკარგულებით დამტკიცებული სამოქმედო გეგმის 148 პუნქტი ითვალისწინებს გარემოსდაცვითი პასუხისმგებლობის შესახებ კანონპროექტის შემუშავების აუცილებლობას.

ა.ე) კანონპროექტის ძალაში შესვლის თარიღის შერჩევის პრინციპი, ხოლო კანონისთვის უკუძალის მინიჭების შემთხვევაში – აღნიშნულის თაობაზე შესაბამისი დასაბუთება:

კანონპროექტი, გარდა მე-13, 29-ე და 30-ე მუხლებისა, ძალაში შედის 2022 წლის პირველი იანვრიდან. მე-13 მუხლი (რომელიც ეხება გარემოსდაცვითი რისკის ფინანსური უზრუნველყოფის საშუალებას) ამოქმედდება 2023 წლის 1 იანვრიდან, ხოლო 29-ე მუხლი (კანონის ამოქმედებასთან დაკავშირებით გამოსაცემი და ძალადაკარგულად გამოსაცხადებელი ნორმატიული აქტები და გასატარებელი ღონისძიებები) და 30-ე მუხლი (კანონის ამოქმედება) - გამოქვეყნებისთანავე. კანონპროექტის ძალაში შესვლის თარიღად 2022 წლის 1 იანვრის შერჩევა განპირობებულია იმ გარემოებით, რომ დაინტერესებულ პირებს მიეცეთ შესაძლებლობა და საკმარისი დრო, კანონპროექტით განსაზღვრულ მოთხოვნებთან მოახდინონ შესაბამისი ადაპტირება. ასევე, როგორც ზემოთ აღინიშნა, კანონპროექტით ყალიბდება გარემოსდაცვითი პასუხისმგებლობის ახალი სისტემა, რომლის შექმნას ჭირდება გარკვეული მოსამზადებელი სამუშაოების გატარება, რაც ასევე დაკავშირებულია გარკვეულ დროსთან.

ა.ვ) კანონპროექტის დაჩქარებული წესით განხილვის მიზეზები და შესაბამისი დასაბუთება (თუ ინიციატორი ითხოვს კანონპროექტის დაჩქარებული წესით განხილვას):

დაჩქარებული წესით განხილვა არ არის მოთხოვნილი.

ბ) კანონპროექტის ფინანსური გავლენის შეფასება საშუალოვადიან პერიოდში (კანონპროექტის ამოქმედების წელი და შემდგომი 3 წელი):

ბ.ა) კანონპროექტის მიღებასთან დაკავშირებით აუცილებელი ხარჯების დაფინანსების წყარო:

კანონპროექტით გათვალისწინებული ხარჯების დაფინანსების წყაროა სახელმწიფო ბიუჯეტი.

ბ.ბ) კანონპროექტის გავლენა სახელმწიფო ან/და მუნიციპალიტეტის ბიუჯეტის საშემოსავლო ნაწილზე:

კანონპროექტის მიღება მოახდენს გავლენას ბიუჯეტის საშემოსავლო ნაწილზე. გამომდინარე იქიდან, რომ კანონპროექტით, გარემოზე მიყენებული მნიშვნელოვანი ზიანისთვის მონეტარული ანაზღაურება ნაწილობრივ იცვლება გამასწორებელი ღონისძიებების განხორციელების ვალდებულებით. ზიანის ფულადი ანაზღაურების შედეგად გადახდილი თანხები ჩაირიცხება გარემოსდაცვითი ზიანის პროგრამაში და მოხმარდება სხვადასხვა გარემოსდაცვითი მიზნების (პირველყოვლისა - დაზიანებული ტერიტორიების გამოსწორების, აღდგენა/გაუმჯობესების ღონისძიებების განხორციელებას. აღსანიშნავია, რომ დღევანდელი მდგომარეობით ხშირ შემთხვევაში ზიანის თანხების ამოღება და სახელმწიფო ბიუჯეტში მიმართვა ვერ ხერხდება. მაგალითად, 2016 წლის მონაცემების მიხედვით, დაანგარიშებული გარემოზე მიყენებული ზიანის თანხა შეადგენდა 10 429 869.06 ლარს, საიდანაც სახელმწიფო ბიუჯეტში გადახდილია მხოლოდ 487 210.87 ლარი, 2017 წელს დაანგარიშებული გარემოზე მიყენებული ზიანის თანხა შეადგენდა 8 873 722.66 ლარს, სახელმწიფო ბიუჯეტში კი გადახდილია 806657.07 ლარი. 2018 წლის მონაცემების თანახმად,

დაანგარიშებული გარემოზე მიყენებული ზიანის თანხა შეადგენდა 10 029 929,4 ლარს, სახელმწიფო ბიუჯეტში კი გადახდილია 830 896,1 ლარი. აქვე მხედველობაშია მისაღები, რომ აღნიშნული თანხებიც საბოლოოდ მიიმართებოდა არა უშუალოდ დაზიანებული გარემოს გამოსასწორებლად, არამედ ბიუჯეტის სხვადასხვა ხარჯების დასაფარად. შესაბამისად, დაზიანებული ტერიტორია, გარემო რჩებოდა დაზიანებულ მდგომარეობაში. აღნიშნულის გათვალისწინებით, მოყვანილი სტატისტიკა ასევე მეტყველებს მოქმედი სისტემის არაეფექტიანობაზე.

ამასთან, სახელმწიფო ბიუჯეტის საშემოსავლო ნაწილზე გავლენა იქონიებს ასევე გარემოს ზედამხედველობის დეპარტამენტსა და სსიპ - გარემოს ეროვნულ სააგენტოში ახალი თანამშრომლების მიერ გადახდილი საშემოსავლო გადასახადის კუთხით.

ამასთან, კანონპროექტი ადგენს ჯარიმების რაოდენობას შემდეგ სამართალდარღვევებზე: გარემოზე ზიანის მიყენების გარდაუვალი საფრთხის ან გარემოზე მიყენებული ზიანის შესახებ შეუტყობინებლობა, დაზიანებული გარემოს პირვანდელ მდგომარეობაში აღდგენის ან პირვანდელ მდგომარეობასთან მიახლოებულ მდგომარეობამდე აღდგენის შესაძლებლობის შესახებ ინფორმაციის წარუდგენლობა, ზიანის პრევენციისთვის/შერბილებებისთვის აუცილებელი ღონისძიებების გაუტარებლობა, გარემოზე მიყენებული ზიანის შემდგომი გავრცელების თავიდან ასაცილებლად ან/და შესარბილებლად აუცილებელი ღონისძიებების გაუტარებლობა, სახელმწიფო ბიუჯეტში ამ კანონით გათვალისწინებული თანხების ჩარიცხვის ვალდებულების შეუსრულებლობა, ზიანის გამასწორებელი ღონისძიებების გეგმის ან/და განსახორციელებელი ღონისძიებების ხარჯთაღრიცხვის შესახებ დასკვნის წარდგენის მოთხოვნების შეუსრულებლობა, გარემოზე ზიანის მიყენებაზე პასუხისმგებელი პირის მიერ ზიანის გამასწორებელი ღონისძიებების გეგმით გათვალისწინებული ღონისძიებების შეუსრულებლობა, გარემოსთვის განსაკუთრებით საშიში საქმიანობის განხორციელება გარემოსდაცვითი რისკის ფინანსური უზრუნველყოფის გარეშე. იმის გათვალისწინებით, რომ ეს თანხები მიიმართება სახელმწიფო ბიუჯეტში, აღნიშნული გამოიწვევს ბიუჯეტის საშემოსავლო ნაწილის გაზრდას, რაც დამოკიდებულია სამართალდარღვევის ოდენობაზე.

კანონპროექტით გათვალისწინებული ადმინისტრაციული სამართალდარღვევისათვის შედგენილი ადმინისტრაციული სამართალდარღვევის შესახებ ოქმი დამრღვევის მიერ საჩივრდება სასამართლოში. აღნიშნულმა შესაძლოა გავლენა იქონიოს სახელმწიფო ბიუჯეტის საშემოსავლო ნაწილზე, ვინაიდან სასამართლოში მიმართვიანობის ზრდის შემთხვევაში გაიზრდება ამ მიმართულებით გადახდილი სახელმწიფო ბაჟის ოდენობა სახელმწიფო ბიუჯეტში.

ამასთანავე, საქმიანობის სუბიექტი ვალდებულია აანაზღაუროს გარემოსდაცვითი ზიანის პროგრამიდან აუცილებელი ღონისძიებების განხორციელების მიზნით გაღებული ხარჯები. აღნიშნული თანხა მიიმართება სახელმწიფო ბიუჯეტში, სახელმწიფო ხაზინის ერთიან ანგარიშზე.

ბ.გ) კანონპროექტის გავლენა სახელმწიფო ან/და მუნიციპალიტეტის ბიუჯეტის ხარჯვით ნაწილზე:

კანონპროექტის მიღება გავლენას იქონიებს საქართველოს 2022 წლის სახელმწიფო ბიუჯეტის ხარჯვით ნაწილზე. გამომდინარე იქედან, რომ აუცილებელია, აღსრულების ეფექტიანი მექანიზმების შექმნა, იმისთვის, რომ კანონპროექტით დადგენილმა რეგულაციებმა პრაქტიკაში განხორციელება ჰპოვოს, აუცილებელია სამინისტროს სისტემაში შემავალი სახელმწიფო საქვეუწყებო დაწესებულება გარემოსდაცვითი ზედამხედველობის

დეპარტამენტის და სსიპ - გარემოს ეროვნული სააგენტოს გაძლიერება ადამიანური რესურსებითა და მატერიალურ ტექნიკური ბაზით.

კანონპროექტის შესაბამისად, სსდ - გარემოსდაცვითი ზედამხედველობის დეპარტამენტი იქნება პასუხისმგებელი საწარმოების შემოწმებაზე, პრევენციის ღონისძიებების შეთანხმებაზე, ზიანის კატეგორიის დადგენაზე, გამასწორებელი ღონისძიებების შესრულების ზედამხედველობაზე, რაც დღეს დეპარტამენტში არსებული რესურსებით წარმოუდგენელია. შესაბამისად, აუცილებელია დეპარტამენტს დაემატოს 16 ინსპექტორის საშტატო ერთეული და გამოიყოს თანხები შემდეგი ოდენობით:

- 1) 16 ინსპექტორის შრომის ანაზღაურება - 309.0 ათ. ლარი;
- 1) 16 ინსპექტორის სასარგებლოდ დაგროვებითი საპენსიო ფონდში გადასარიცხი თანხა - 6.0 ათ. ლარი;
- 1) 4 ერთეული სატრანსპორტო საშუალების შეძენა - 182.0 ათ. ლარი;
- 1) ინსპექტორების აღჭურვილობა - 28.0 ათ. ლარი;
- 1) უნიფორმა - $16 \times 800 = 14.0$ ათ. ლარი;
- 1) საოფისე ტექნიკა (კომპიუტერები, პრინტერ/სკანერები, მაცივრები ლაბ. მასალისთვის) - 23.0 ათ. ლარი;
- 1) საოფისე ავეჯი, სხვადასხვა საოფისე საქონელი - 10.0 ათ. ლარი;
- 1) 4 ერთეული სატრანსპორტო საშუალების საწვავის ტექნომსახურების, რემონტისა და მოვლა-შენახვის ხარჯი - 60.0 ათ. ლარი;
- 1) პერსონალის დაზღვევის ხარჯი - $16 \times 30 \times 12 = 6.0$ ათ. ლარი;
- 1) ფიჭური კავშირგაბმულობის ხარჯი - $16 \times 10 \times 12 = 2.0$ ათ. ლარი;
- 1) ექსპერტიზისა და ლაბორატორიული კვლევების ხარჯი - 140.0 ათ. ლარი;
- 1) მივლინება - 25.0 ათ. ლარი.

ჯამში დეპარტამენტისთვის საჭირო იქნება 2022 წლის სახელმწიფო ბიუჯეტიდან სულ 791.0 ათ. ლარის გამოყოფა.

კანონპროექტის შესაბამისად სსიპ გარემოს ეროვნული სააგენტო პასუხისმგებელი იქნება გამასწორებელი ღონისძიებების გეგმების შეთანხმებაზე და გამასწორებელი ღონისძიებების გეგმის პროექტების საჯარო განხილვაზე, რაც დღეს სააგენტოში არსებული რესურსებით წარმოუდგენელია. შესაბამისად, აუცილებელია სააგენტოს დაემატოს 22 საშტატო ერთეული, რომლის ფარგლებშიც სააგენტოში 2022 წლის იანვრიდან შეიქმნება ახალი პირველადი სტრუქტურული ქვედანაყოფი. აღნიშნული სტრუქტურული ქვედანაყოფი შეიქმნება ახალი ადამიანური რესურსის დაკომპლექტებით. მისი სპეციფიკა მოითხოვს კონკრეტული დარგების (ნიადაგის, წყლისა და ბიომრავალფეროვნების) მაღალკვალიფიცირებული სპეციალისტების მოზიდვას, რაც შრომის ბაზარზე გამოხატულია მათ სიმწირეში და მათი დაინტერესება, კერძო და საჯარო სექტორების კონკურენციის ფარგლებში, ვინაიდან კერძო სექტორში ამ დარგის სპეციალისტების სიმცირის გამო შრომის ანაზღაურების მაღალი ზღვარია საჯარო სექტორთან შედარებით, ამიტომ მათი მოძიება გარკვეულ სიმძნელბთანაა დაკავშირებული.

ყოველივე ამის გათვალისწინებით, მნიშვნელოვანია რომ სსიპ გარემოს ეროვნულმა სააგენტომ და სსდ - გარემოსდაცვითი ზედამხედველობის დეპარტამენტმა, კანონის სრულად ამოქმედებამდე, შექმნას აღნიშნული სტრუქტურული ქვედანაყოფი და შესაბამისი კვალიფიკაციის კადრების მოძიების მიზნით კონკურსების ჩატარება, თანამშრომლების დანიშვნა, მათ გადამზადება და კვალიფიკაციის ამაღლება (ტრენინგები), სამუშაო აღწერილობებისა და მეთოდოლოგიის შემუშავება, შესაბამისი მატერიალურ-ტექნიკურ

უზრუნველყოფა და სხვა, რის გარეშეც კანონის სრულად ამოქმედების შემდეგ შეუძლებელი იქნება სააგენტოსა და დეპარტამენტის მიერ აღნიშნული მნიშვნელოვანი ფუნქციების განხორციელება.

შესაბამისად, აღნიშნული ფუნქციის განხორციელებისთვის სსიპ გარემოს ეროვნული სააგენტოსთვის საჭირო იქნება 2022 წლის სახელმწიფო ბიუჯეტიდან სულ 1,063.0 ათ. ლარის გამოყოფა:

-)] 22 საშტატო ერთეულის შრომის ანაზღაურება - 505.0 ათ. ლარი;
-)] 22 თანამშრომლების სასარგებლოდ დაგროვებითი საპენსიო ფონდში გადასარიცხი თანხა - 10.0 ათ. ლარი;
-)] უნიფორმა - $22 \times 1,070.0 = 23.54$ ათ. ლარი;
-)] საოფისე ტექნიკა (კომპიუტერები, პრინტერ/სკანერები) - 30.8 ათ. ლარი;
-)] საოფისე ავეჯი, სხვადასხვა საოფისე საქონელი - 17.66 ათ. ლარი;
-)] მივლინება - 89.0 ათ. ლარი;
-)] ფიჭური კავშირგაბმულობის ხარჯი - 2.2 ათ. ლარი;
-)] საველე ხელსაწყოები (GPS-ები) - 50.0 ათ. ლარი;
-)] 4 ერთეული სატრანსპორტო საშუალების შემენა - 260.0 ათ. ლარი;
-)] 4 ერთეული სატრანსპორტო საშუალების საწვავის ტექმომსახურების, რემონტის, მოვლა-შენახვის და დაზღვევის ხარჯი - 74.8 ათ. ლარი.

როგორც ცნობილია, „გარემოს დაცვის შესახებ“ საქართველოს კანონის 58² მუხლი (გარემოსდაცვითი ღონისძიებების დაფინანსების დროებითი წესი) განსაზღვრავს, რომ „ერთი მხრივ, საქართველოსა და, მეორე მხრივ, ევროკავშირსა და ევროპის ატომური ენერჯის გაერთიანებას და მათ წევრ სახელმწიფოებს შორის ასოცირების შესახებ“ 2014 წლის 27 ივნისის შეთანხმებით ნაკისრი ვალდებულებების სრულად შესრულებამდე სახელმწიფო ბიუჯეტის შესახებ წლიური კანონის პროექტის მომზადებისას გარემოსდაცვით ღონისძიებებთან დაკავშირებული პროგრამული კოდებით გათვალისწინებული ასიგნებები საბიუჯეტო სახსრების ნაწილში უნდა გაიზარდოს არანაკლებ წინა წლის სახელმწიფო ბიუჯეტით განსაზღვრული ასიგნებების 5%-ით.“. კანონპროექტის ამოქმედება გათვალისწინებულია 2022 წლის 1 იანვრიდან, შესაბამისად, 2022 წლის ბიუჯეტის დაგეგმვისას აუცილებელია გათვალისწინებულ იქნეს სსდ გარემოსდაცვითი ზედამხედველობის დეპარტამენტისა და სსიპ გარემოს ეროვნული სააგენტოს გაძლიერებისათვის სახელმწიფო ბიუჯეტიდან შესაბამისი თანხების გამოყოფა, რადგან პრიორიტეტულობის თვალსაზრისით, უმნიშვნელოვანია, ქვეყანაში სწორი გარემოსდაცვითი მმართველობის ჩამოსაყალიბებლად გამართული გარემოსდაცვითი პასუხისმგებლობის სისტემის არსებობა და აღსრულების სათანადო მექანიზმების დანერგვა, რაც დეპარტამენტისა და სააგენტოს გაძლიერების გარეშე წარმოუდგენელი იქნება.

ამასთან, კანონპროექტში აღნიშნულია, რომ თუ მნიშვნელოვანი ზიანი გამოწვეულია კანონის მე-2 დანართით გათვალისწინებული საქმიანობის ფარგლებში, აღნიშნული საქმიანობის განმახორციელებელ პირს ეკისრება მკაცრი გარემოსდაცვითი პასუხისმგებლობა. კანონპროექტის თანმდევ სისხლის სამართლის კოდექსის პროექტი კი მნიშვნელოვანი ზიანის შემთხვევაში ითვალისწინებს პასუხისმგებლობის სახით ჯარიმას და თავისუფლების აღკვეთას. შესაბამისად, კანონპროექტი გავლენას მოახდენს ბიუჯეტის ხარჯვით ნაწილზე, იმ ხარჯების ფარგლებში, რაც დაკავშირებულია თავისუფლების აღკვეთასთან.

კანონით გათვალისწინებული ადმინისტრაციული სამართალდარღვევისათვის შედგენილი ადმინისტრაციული სამართალდარღვევის შესახებ ოქმი დამრღვევის მიერ

საჩივრდება სასამართლოში. აღნიშნულმა შესაძლოა გავლენა მოახდინოს სასამართლოს ხარჯებზე, ვინაიდან სასამართლოს მიამრთვიანობის შემთხვევაში შესაძლოა გაეზარდოს საქმეების რაოდენობა და შესაბამისად ამ მიმართულებით ხარჯებით.

აქვე აღსანიშნავია, რომ კანონპროექტით გათვალისწინებული გარემოსდაცვითი ზიანის პროგრამის დაფინანსება სახელმწიფო ბიუჯეტიდან მოხდება განსაკუთრებული წესით. კერძოდ, პროგრამის დაფინანსება, დასაგეგმი საბიუჯეტო წლისთვის, განისაზღვრება არანაკლებ ამავე კანონით გათვალისწინებულ შემთხვევებში სახელმწიფო ბიუჯეტში წინა წელს მიმართულ სახსრებზე ნაკლები სახსრების ოდენობით. შესაბამისად, აღნიშნული პროგრამის რეალური ფორმირება მოხდება კანონის ამოქმედების (2022 წელი) შემდგომ წლებში. აქვე გასათვალისწინებელია, რომ გარემოსდაცვითი ზიანის პროგრამის განკარგვისთვის, კანონით იქმნება შესაბამისი კომისია. თუმცა, კომისიის შექმნა არ გამოიწვევს სახელმწიფო ბიუჯეტის ხარჯვითი ნაწილის ზრდას, რადგან კომისიის შემადგენლობაში იქნებიან შესაბამისი უწყებების და არასამთავრობო ორგანიზაციების წარმომადგენლები (ზუსტი რაოდენობა განისაზღვრება საქართველოს მთავრობის დადგენილებით) და კომისიაში მონაწილეობა არ იქნება ანაზღაურებადი. ამასთან, კომისიას არ ეყოლება აპარატი. მისი საქმიანობის ადმინისტრაციულ-ტექნიკურ უზრუნველყოფას განახორციელებს სამინისტრო, არსებული რესურსებით.

ბ.დ) სახელმწიფოს ახალი ფინანსური ვალდებულებები, კანონპროექტის გავლენით სახელმწიფოს ან მის სისტემაში არსებული უწყების მიერ მისაღები პირდაპირი ფინანსური ვალდებულებების (საშინაო ან საგარეო ვალდებულებები) მითითებით:

კანონპროექტით არ დგინდება სახელმწიფოს ახალი ფინანსური ვალდებულებები.

ბ.ე) კანონპროექტის მოსალოდნელი ფინანსური შედეგები იმ პირთათვის, რომელთა მიმართაც ვრცელდება კანონპროექტის მოქმედება, იმ ფიზიკურ და იურიდიულ პირებზე გავლენის ბუნებისა და მიმართულების მითითებით, რომლებზედაც მოსალოდნელია კანონპროექტით განსაზღვრულ ქმედებებს ჰქონდეს პირდაპირი გავლენა:

კანონპროექტის მიღება გამოიწვევს ფინანსურ შედეგებს იმ პირთათვის, რომელთა მიმართაც ვრცელდება კანონპროექტის მოქმედება. კანონპროექტის მიღების შედეგად, საქმიანობის განმახორციელებელს დაეკისრება ჯარიმა ადმინისტრაციული სამართალდარღვევისათვის და გამასწორებელი ღონისძიებების განხორციელების ვალდებულება, რითიც მას ფინანსური ტვირთი შეუძსუბუქდება, რადგან გამასწორებელი ღონისძიებები დროში იქნება გაწერილი და მისცემს საშუალებას კერძო სამართლის სუბიექტს იმგვარად დაგეგმოს თავისი ბიუჯეტი და შემოსულობები, რომ დროში გაწერილ ვადებში ეტაპობრივად შეასრულოს მასზე დაკისრებული ვალდებულებები. აქვე უნდა აღინიშნოს ისიც, რომ ზიანის პრევენციის მექანიზმის შემოღება ასევე შეამცირებს საქმიანობის განმახორციელებლის ხარჯებს, გამომდინარე იქიდან, რომ ზიანის დადგომის გარდაუვალ საფრთხეზე დროული რეაგირებისას, თავიდან იქნება აცილებული ზიანის დადგომა, რომლის გამოსწორებაც უფრო დიდ მასშტაბებთან და თანხებთან არის დაკავშირებული.

კანონპროექტის მიღების შედეგად, სამართალდამრღვევ პირებს დაეკისრებათ ვალდებულება აანაზღაუროს ზიანი, ხოლო მნიშვნელოვანი ზიანის შემთხვევაში - განახორციელოს ზიანის გამასწორებელი ღონისძიებება, რაც დაკავშირებულია ხარჯებთან. ასევე, კანონპროექტით, საქმიანობის სუბიექტი ვალდებულია აანაზღაუროს გარემოსდაცვითი ზიანის პროგრამიდან აუცილებელი ღონისძიებების განხორციელების მიზნით გაღებული ხარჯები.

ამასთან, კანონპროექტში აღნიშნულია, რომ თუ მნიშვნელოვანი ზიანი გამოწვეულია კანონის მე-2 დანართით გათვალისწინებული საქმიანობის ფარგლებში, აღნიშნული საქმიანობის განმახორციელებელ პირს ეკისრება მკაცრი გარემოსდაცვითი პასუხისმგებლობა. კანონპროექტის თანმდევ სისხლის სამართლის კოდექსის პროექტი კი მნიშვნელოვანი ზიანის შემთხვევაში ითვალისწინებს პასუხისმგებლობის სახით ჯარიმას და თავისუფლების აღკვეთას. შესაბამისად, კანონპროექტი გავლენას მოახდენს იმ პირებზე, რომლებსაც დაეკისრებათ მკაცრი გარემოსდაცვითი პასუხისმგებლობა.

კანონპროექტის თანახმად, გარემოსთვის განსაკუთრებით საშიში საქმიანობის განმახორციელებელი პირი ვალდებულია, საქმიანობის დაწყებისთანავე გააჩნდეს შესაბამისი გარემოსდაცვითი რისკის ფინანსური უზრუნველყოფის საშუალება. შესაბამისად, კანონპროექტის ამოქმედება გამოიწვევს აღნიშნული პირებისთვის ხარჯების გაზრდას. ასევე, ზიანის ანაზრაურებაზე პასუხისმგებელ პირს შესაძლოა დამატებითი ხარჯი ჰქონდეს, ვინაიდან ზიანის გამასწორებელი ღონისძიებების გეგმის პროექტს თან უნდა ერთვოდეს აუდიტორის/აუდიტორული ფირმის მიერ დადასტურებული ზიანის გამასწორებელი ღონისძიებების გეგმის პროექტის ხარჯთაღრიცხვა.

ბ.ვ) კანონპროექტით დადგენილი გადასახადის, მოსაკრებლის ან სხვა სახის გადასახდელის (ფულადი შენატანის) ოდენობა შესაბამის ბიუჯეტში და ოდენობის განსაზღვრის პრინციპი:

კანონპროექტით დგინდება ჯარიმები შემდეგ სამართალდარღვევებზე: გარემოზე ზიანის მიყენების გარდაუვალი საფრთხის ან გარემოზე მიყენებული ზიანის შესახებ შეუტყობინებლობა - 5 000 ლარიდან 10 000 ლარამდე, დაზიანებული გარემოს პირვანდელ მდგომარეობაში აღდგენის ან პირვანდელ მდგომარეობასთან მიახლოებულ მდგომარეობამდე აღდგენის შესაძლებლობის შესახებ ინფორმაციის წარუდგენლობა - 5 000 ლარის ოდენობით, ზიანის პრევენციისთვის/შერბილებისთვის აუცილებელი ღონისძიებების გაუტარებლობა - 10 000 ლარიდან 20 000 ლარამდე, გარემოზე მიყენებული ზიანის შემდგომი გავრცელების თავიდან ასაცილებლად ან/და შესარბილებლად აუცილებელი ღონისძიებების გაუტარებლობა - 20 000 ლარიდან 40 000 ლარამდე, ამ კანონით გათვალისწინებული თანხების სახელმწიფო ბიუჯეტში ჩარიცხვის ვალდებულების შეუსრულებლობა - 5000 ლარიდან 10 000 ლარამდე, ზიანის გამასწორებელი ღონისძიებების გეგმის ან/და განსახორციელებელი ღონისძიებების ხარჯთაღრიცხვის შესახებ დასკვნის წარდგენის მოთხოვნების შეუსრულებლობა - 1 000 ლარის ოდენობით, გარემოზე მნიშვნელოვანი ზიანის მიყენებაზე პასუხისმგებელი პირის მიერ ზიანის გამასწორებელი ღონისძიებების გეგმის ან/და განსახორციელებელი ღონისძიებების ხარჯთაღრიცხვის შესახებ დასკვნის წარდგენის ვალდებულების შეუსრულებლობა 20 000 ლარიდან 40 000 ლარამდე, გარემოზე ზიანის მიყენებაზე პასუხისმგებელი პირის მიერ ზიანის გამასწორებელი ღონისძიებების გეგმით გათვალისწინებული ღონისძიების შეუსრულებლობა გამოიწვევს - 40 000 ლარიდან 80 000 ლარამდე, გარემოსთვის განსაკუთრებით საშიში საქმიანობის განხორციელება გარემოსდაცვითი რისკის ფინანსური უზრუნველყოფის გარეშე - 10 000 ლარის ოდენობით.

გ) კანონპროექტის მიმართება საერთაშორისო სამართლებრივ სტანდარტებთან:

გ.ა) კანონპროექტის მიმართება ევროკავშირის სამართალთან:

კანონპროექტი არ ეწინააღმდეგება ევროკავშირის სამართალს.

გ.ბ) კანონპროექტის მიმართება საერთაშორისო ორგანიზაციებში საქართველოს წევრობასთან დაკავშირებულ ვალდებულებებთან:

კანონპროექტი არ ეწინააღმდეგება საერთაშორისო ორგანიზაციებში საქართველოს წევრობასთან დაკავშირებულ ვალდებულებებს.

გ.გ) კანონპროექტის მიმართება საქართველოს ორმხრივ და მრავალმხრივ ხელშეკრულებებთან და შეთანხმებებთან, აგრეთვე, ისეთი ხელშეკრულების/შეთანხმების არსებობის შემთხვევაში, რომელსაც უკავშირდება კანონპროექტის მომზადება, – მისი შესაბამისი მუხლი ან/და ნაწილი:

კანონპროექტის მიღება არ ეწინააღმდეგება საქართველოს ორმხრივ და მრავალმხრივ ხელშეკრულებებსა და შეთანხმებებს. კანონპროექტის მიღება გამომდინარეობს ასოცირების შესახებ შეთანხმების 306-ე მუხლიდან, რომლის თანახმადაც საქართველო ვალდებულია მოახდინოს ეროვნული კანონმდებლობის დაახლოება XXVI დანართში მითითებულ ევროკავშირის სამართლებრივ აქტებთან. ამავ დანართის დებულებების შესაბამისად, საქართველოს აქვს აღებული ვალდებულება თავისი კანონმდებლობა დაუახლოვოს „გარემოსდაცვითი პასუხისმგებლობის შესახებ“ 2004 წლის 21 აპრილის ევროპარლამენტისა და საბჭოს 2004/35/EC დირექტივას.

გ.დ) არსებობის შემთხვევაში, ევროკავშირის ის სამართლებრივი აქტი, რომელთან დაახლოების ვალდებულებაც გამომდინარეობს „ერთი მხრივ, საქართველოსა და, მეორე მხრივ, ევროკავშირისა და ევროპის ატომური ენერჯის გაერთიანებას და მათ წევრ სახელმწიფოებს შორის ასოცირების შესახებ შეთანხმებიდან“ ან ევროკავშირთან დადებული საქართველოს სხვა ორმხრივი და მრავალმხრივი ხელშეკრულებებიდან:

„გარემოსდაცვითი პასუხისმგებლობის შესახებ“ 2004 წლის 21 აპრილის ევროპარლამენტისა და საბჭოს 2004/35/EC დირექტივა.

დ) კანონპროექტის მომზადების პროცესში მიღებული კონსულტაციები:

დ.ა) სახელმწიფო, არასახელმწიფო ან/და საერთაშორისო ორგანიზაცია/დაწესებულება, ექსპერტი, სამუშაო ჯგუფი, რომელმაც მონაწილეობა მიიღო კანონპროექტის შემუშავებაში, ასეთის არსებობის შემთხვევაში:

კანონპროექტი, საჯარო გაცნობისთვის, გამოქვეყნებული იყოს საქართველოს გარემოს დაცვისა და სოფლის მეურნეობის სამინისტროს და სსიპ - გარემოსდაცვითი ინფორმაციისა და განათლების ცენტრის ოფიციალურ ვებგვერდებზე. ასევე, ჩატარდა საჯარო განხილვა (2018, 2020 წწ) და არაერთი სამუშაო შეხვედრა სხვადასხვა უწყების (მათ შორის, ბიზნესომბუდსმენის აპარატის, ა(ა)იპ „გავიგუდეთ“) წარმომადგენლების მონაწილეობით.

დ.ბ) კანონპროექტის შემუშავებაში მონაწილე ორგანიზაციის/დაწესებულების, სამუშაო ჯგუფის, ექსპერტის შეფასება კანონპროექტის მიმართ, ასეთის არსებობის შემთხვევაში:

ასეთი არ არსებობს.

დ.გ) სხვა ქვეყნების გამოცდილება კანონპროექტის მსგავსი კანონების იმპლემენტაციის სფეროში, იმ გამოცდილების მიმოხილვა, რომელიც მაგალითად იქნა გამოყენებული კანონპროექტის მომზადებისას, ასეთი მიმოხილვის მომზადების შემთხვევაში:

ასეთი მიმოხილვა არ მომზადებულა.

ე) კანონპროექტის ავტორი:

საქართველოს გარემოს დაცვისა და სოფლის მეურნეობის სამინისტრო.

ვ) კანონპროექტის ინიციატორი:

საქართველოს მთავრობა.